
Kolonija vrana gačaca (*Corvus frugilegus*) u Zavidovićima

Collony of Rooks (*Corvus frugilegus*) in Zavidovići: Thirty breeding sites of Rooks (*Corvus frugilegus*) on three Silver-Leaf Poplar *Populus alba* were seen on 10 April 2005 in Zavidovići (UTM BQ72).

Prema posljednjim posmatranjima ornitologa [Obratil, S., 1979: Gniježđenje vrana gačaca (*Corvus frugilegus frugilegus* Linaeus, 1758) u Bosni i Hercegovini. - Glasnik Zemaljskog muzeja u Bosni i Hercegovini, Prirodne nauke, Nova serija, XVIII: 251-258], u Zavidovićima su 1980. godine postojale tri kolonije vrana gačaca *Corvus frugilegus*, sve tri u samome gradu, sa ukupno 364 para, od čega je samo u jednoj koloniji, onoj na lijevoj obali rijeke Bosne na drvoredu topola, bilo 306 parova (gnijezda). To je po broju bila najveća kolonija vrana gačaca u Bosni i Hercegovini. Iz podataka o prvom gniježđenju vrana gačaca u Zavidovićima, iz 1951. godine, kada su se gnijezdila samo dva para [Kocer, F., 1954: Kolonija vrana gačaca. - Lovački list, 4: 33] i podatka iz 1980. godine može se vidjeti kakav je bio populacioni potencijal ove vrste.

Temeljita sječa topola u gradu (bar su u tome u Zavidovićima vješti) osamdesetih godina sigurno je uzrokovala i drastično smanjenje broja gnijezda, ali o tome nema podataka. Ovogodišnja populacija je svega 30 parova koji se gnijezde na tri topole uz obalu rijeke Bosne pored hotela „Kristal“. U to smo se uvjerali Dražen Kotrošan i ja kada smo izašli iz Doma kulture, 10. 4. 2005. godine, nakon što je završio ponovo pokrenuti godišnji susret speleologa BiH.

Jasminko Mulaomerović
B. Zenuni 6, 71000 Sarajevo